

Morning Dogri (NSD) Bulletin 18-04-2024

आकाशवाणी

- चुनांस आयोग नै लोकसभा चुनाएं दे चौथे मरहले लेई अधिसूचना अज्ज जारी करी दिती ऐ।
- केंद्र शासित प्रदेश जम्मू-कश्मीर दे अनंतनाग च आतंकवादिएं आस्सेआ चलाई गेदी गोलिएं च बिहार दा इक मजदूर मारेआ गोआ।
- भारत, चीन गी अबादी दे मुकाबले च पिच्छे छोड़दे होई दुनिया च पैहले पायदान पर पुज्जी गोआ ऐ।
- भारत मौसम विभाग नै उडीशा ते पच्छिम बंगाल च अगले त्रुं ध्याइं दौरान जबरदस्त लू आहले हालात दी पेशनगोई कीती ऐ।
- टेनिस च राफेल नेडाल बार्सिलोना ओपन च एलेक्स दे मिनौर दे खिलाफ सिद्धे सेटें च हार दे मगरा बार्सिलोना ओपन टूर्नामेंट थमां बाहर होई गे न।

<><><><><><>

Notification

चुनांस आयोग नै लोकसभा दे चौथे चरण दे चुनांस लेई अधिसूचना अज्ज जारी करी दिती ऐ। इस चरण च 13 मई गी 9 राज्यें ते इक केंद्र शासित प्रदेश दिएं कुल 96 लोकसभा सीटें पर चुनांस होग। मेदवार 25 अप्रैल तगर नामजदगी आले कागद-पत्र दाखल करी सकडन।

West Bengal

चुनांस आयोग नै पच्छिम बंगाल दे गवर्नर गी कल मतदान दे ध्याड़े कूच बिहार दा दौरा नेई लाने लेई सलाह दिती ऐ, जेड़ा आचार संहिता दे उल्लंघन कन्नै सरबंधत ऐ। चुनांस आयोग च सूत्रे दस्सेआ ऐ जे मतदान आहला ध्याड़ा होने दे नाते जिले च गवर्नर लेई कोई बी मुकामी प्रोग्राम दा आयोजन नेई कीता जाई सकदा।

<><><><><><>

Assam-Election

असम च पैहले गेढ़ दे मतदान लेई अज्ज बड्डलै मतदान बूथें लेई चुनावी अमलें गी ई.वी.एम. मशीनें ते होरनें सरबंधत समेयान कन्नै रवाना कीता जा रदा ऐ। इस गेड़ तैहत 5 सीटें दे चुनांस गी कवर कीता जाना ऐ। इस मरहले दे मतदान च कुल 35 मेदवार चुनांस मैदान च न। राज्य पुलस नोडल अफसर प्रसन्नता कुमार भूयान होरें आखेआ जे केंद्री अर्ध सैनिक बलें दी 106 कंपनियां तैनात 14 जिलें च कीतिआं गेदियां न जित्थे पैहले मरहले तैहत वोट पौने न। उनें आखेआ जे कुसै बी चाल्लीदी माड़ी घटना होने गी रोकने लेई अंतर राज्य बार्ड गी पैहले गै सील कीता गेआ ऐ।

<><><><><><>

Amit-Shah

बीजेपी दे वरिष्ठ नेता ते गृह मंत्री अमित शाह होर अजज गांधी नगर लोकसभा हल्के च 3 रोड शो करडन ते इक रैली गी बी संबोधित करडन। गांधी नगर लोकसभा सीट लेई बीजेपी दे मेदवार अमित शाह होर कल अपनी नामजदगी दाखल करडन। स्हाड़े संवाददाता नै दस्सेया ऐ जे शाह होर अहमदाबाद जिले दे साणंद शैहरा च अज्ज अपना पैहला रोड शो करडन ते गांधी नगर जिले दे कलोल शैहरा च दुआ रोड शो करडन। उंदा त्रीया रोड शो अहमदाबाद शैहरा दे प्रमुख इलाकें गी कवर करोग। शाह होर अहमदाबाद दे बेजालपुर इलाके च चुनावी सभा गी बी संबोधित करडन। बीजेपी दे नेता अनुराग सिंह ठाकुर बी अज्ज गुजरात च पार्टी लेई प्रचार करडन। ओह अज्ज जामनगर च इक रोड शो करडन ते रैली अगगे भाषण बी देडन। पंजाब दे मुखमंत्री भगवंत मान होर कल गुजरात दे दौरे पर हे। उनें भडूच च आम आदमी पार्टी दे मेदवार चैतर वासवा दे समर्थन च रोड शो कीता हा।

<><><><><><>

Terror-Attack

कश्मीर घाटी च दक्खनी कश्मीर दे अनंतनाग जिले दे बिजबिहाड़ा इलाके दे जबलीपोरा च आतंकवादिएं गोलियां चलाइयां जेदे च इक माहनू मारेआ गेआ। ओहदी पंछान राजू शाह दे तौरा पर होई ऐ जे बिहार दा रौहने आहला ऐ।

इस घटना दे मगरा तुरत पुलिस नै गंभीर तौर पर जख्मीं गी उपचार लेई अस्पताल च दाखल करोआया। हालांकि गंभीर तौर पर जख्मीं होए दे इस माहन् गी बचाया नेई जाई सकेया ते उन्नै इलाज दौरान जख्में दी पीड़ नेई जरदे होई दम त्रोड़ी दिता। सुरक्षाबलें इलाके दी घेराबंदी कीती ऐ ते इस घटना गी अंजाम देने आहले दी दर पकड़ लेई व्यापक मुहिम चलाई गेदी ऐ।

<><><><><><>

Population

आबादी दे लिहाज कन्नै भारत दुनिया च पैहली थाहरै पर ऐ। इक अंदाजे मताबक भारत दी अबादी 144 करोड़ ऐ। संयुक्त राष्ट्र दे अबादी सरबन्धी कोष UNFPA दी इक रिपोर्ट मुजब 1 इशारिया 4-2-5 अरब अबादी दे कन्नै चीन दुई थाहरै पर ऐ। UNFPA भारत दी अबादी च बाददे गी समाजी आर्थिक स्थिति च सुधार ते देसै च मातृ-मृत्यु दर च गिरावट कन्नै जोड़दा ऐ। बरे 2011 च होई दी मरदमशुमारी मुजब भारत दी आबाद 121 करोड़ ही। संयुक्त राष्ट्र दे अंदाजे मुजब 2022 च चीन दी अबादी 2 इशारिया 4-2-6 बिलियन होई गेई ही पर मगरा एहदे च गिरावट औनी शुरू होई गेई। भारत दी अबादी अप्रैल 2023 दे अखीरै तगर चीन दे बरोबर होई गेई ही। माहिरें भविक्खवाणी कीती ऐ जे इस सदी दे अखीरै तगर चीन दी अबादी 1 बिलियन थमां हेठ जाई सकदी ऐ, जदके भारत दी अबादी अगले किश दहाकें च बधदे रौहने दी मेद ऐ।

<><><><><><>

Smoke Free Zone

जम्मू-कश्मीर च मतदाताएं दे तजुर्बे गी बेहतर बनाने दी दिशा च इक महत्वपूर्ण गैह् पुट्टदे होई केंद्र शासित प्रदेश दे मुख् चुनांs अधिकारी होरें समूलचे जम्मू-कश्मीर दे सब्बनें निर्वाचन केंद्रें गी तम्बाकू मुक्त खेतर घोषित कीता ऐ। आकाशवाणी जम्मू दे संवाददाता नै दस्सेआ ऐ जे कश्मीर दे सेहत सेवा निदेशालय थमां हासल निर्देशें मुजब मुख् चुनांs अधिकारी होरें गी मतदान केंद्रें च धुआं-मुक्त वातावरण यकीनी बनाने दी अपील कीती गई ऐ। जम्मू-कश्मीर ओकड़े पैहले राज्यें ते केंद्र शासित प्रदेशें च शामिल ऐ जित्थे इस चाल्ती दे हुक्म जारी कीते गे न। मुख् चुनांs अधिकारी होरें इस सरबंथे च सब्बनें जिला चुनांs अधिकारिणं गी एह् हिदायतां जारी कीतियां न।

<><><><><><>

Weather

मौसम विभाग नै अगले त्रुं दिनें दौरान ओडिशा ते पच्छिम बंगाल दे किश हिस्सें च जबरदस्त लू चलने दी शँका जताई ऐ। झारखंड, उत्ती कोंकण, सौराश्ट्र, मध्य महाराश्ट्र, आंध्र प्रदेश दे समुंदरी कंडें आले इलाके, तेलंगाना, तमिलनाडू ते पुडुचेरी च बी लू चलने ज्नेय हालात बने दे रौहडन। मौसम विभाग नै अगले दऊं दिनें दौरान पूर्वी ते दक्खनीप्रायद्वीप दे हिस्सें च बद्दोबद्द तापमान च 2 शां 3 डिग्री सैल्यिस दा बाद्दा होने दी संभावना बी जताई ऐ।

मौसम विभाग नै अज्जै थमां लेइयै ऐतवार तोहड़ी उत्तर पच्छमी भारत च अंधी-झक्खड़ दे कन्नै बरखा दा बी अनुमान जताया ऐ। जम्मू-कश्मीर, लद्दाख, गिलगित, बाल्टिस्तान, मुजफ्फराबाद, हिमाचल प्रदेश ते उत्तराखंड च हौली थमां दरम्याने दर्जे दी बरखा दे आसार न। मौसम विभाग नै पंजाब, हरियाणा, चंडीगढ़ ते दिल्ली च अगले दऊं दिनें दरान कुते-कुते हौली बरखा दा बी अनुमान जताया ऐ।

<><><><><><>

Tennis

टेनिस च राफेल नडाल एलेक्स डी मिनोर थमां सिद्दे सैटें च हारने दे बाद बार्सीलोना ओपन प्रतियोगिता थमां बाहर होई गे न। दुनिया दे चौथे नम्बरै दे खडारी एलेक्स नडाल गी 7-5, 6-1 कन्नै हराने परैंत प्रतियोगिता दे त्रीये राउंड च दाखल होई गे न। नडाल इस बरे दी दुई प्रतियोगिता च हिस्सा लै करदे हे।

<><><><><><>

Cricket-IPL

आई.पी.एल क्रिकेट च कल अहमदाबाद च खेड्ढे गेदे इक मुकाबले च दिल्ली कैपिटल्स दीटीम नै गुजरात टाइटन्स गी 6 विकटें कन्नै हराया। 90 रन्जें दे लक्ष्य दा पिच्छा करदे होई दिल्ली कैपिटल्स दी टीम नै छड़े 8 ओवर ते 5 गेंदें च 6 विकटां बकाया रौहंदे इस मैच गी जिती लैता।

अज्जै दा मैच पंजाब किंग्स ते मुम्बई इंडियन्स बश्कार चंडीगढ़ च खेड्ढे
जाग। एह् मैच संझा साड्ढे 7 बजे शुरू होग।

<><><><><><>